



**Sumáriu Kazu
Tribunál Judisiál Primeira Instáncia Baukau
Dezembu 2024**

Afirmasaun: Sumáriu Kazu tuir mai ne'e deskreve faktu sira no prosesu iha Tribunál tuir JSMP nia monitorizasaun independente, no deklarasaun ne'ebé parte sira fó iha Tribunál nia laran. Informasaun ne'e la representa JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

A. Sumáriu prosesu julgamentu kazu iha Tribunál Judisiál Primeira Instáncia Baukau

1. Totál kazu ne'ebé JSMP monitoriza: 10

Artigu	Tipu Kazu	Númeru
Artigu 145 Kódigu Penál (KP) & artigu 2, 3, no 35 letra (b), 36 Lei Kontra Violénsia Doméstika (LKVD)	Ofensa ba integridade fízika simples ho natureza violénsia doméstika no tipu ilísitu sira kona-ba violénsia doméstika	8
Artigu 2(nú.1(b), nú. 2(f)) no artigu 20(nú.1) hosi Lei Nú. 5/2017	Arma brankas	1
Artigu 157 KP	Ameasa	1
Totál		10

2. Totál desizaun ne'ebé JSMP monitoriza: 10

Tipu desizaun	Artigu	Númeru
Suspensaun ba prizaun nia ezekusaun	68 KP	4
Multa	67 KP	5
Absolve		1
Totál		10

3. Totál kazu ne'ebé sei kontinua prosesu tuir JSMP nia monitorizasaun: 0

B. Deskrisaun sumáriu julgamentu ba desizaun kazu sira

1. Krime arma brankas

Nú. Prosesu : 0048/22. PDBAU

Kompozisaun Tribunál : Koletivu

Juis : Dra. Maria Solana da C. Fernandes no Dra.

Maria Modesta d. A. Viera, Dra. Sribuana da
Costa

Prokuradór : Dr. Ambrósio Rangel Freitas
Defeza : Dr. Sidónio Maria Sarmiento
Desizaun : Pena prizaun tinan 3 suspende ba tinan 3

Iha 05 Dezembru 2024, Tribunál Judisiál Primeira Instánsia Baukau prezide leitura akordaun ba krime arma brankas ne'ebé envolve arguidu Eusebio Fatima da Silva no Adelino Fátima Gusmão da Silva hasoru Estadu RDTL, iha Suku Triloka, Postu Administrativu Baukau Vila, Munisípiu Baukau.

Akuzasaun Prokuradór

Prokuradór akuza katak iha 24 Marsu 2022, iha oras tuku 12:00 meudia, Augustu da Silva, Ernesto da Silva, Apolinario Xavier no Carlos Silva uza traktór hamos hela natar fatin, derepente arguidu sira mosu ho katana no arguidu Adelino ho katana halai ba Ernesto atu taa maibé la konsege, arguidu tuku fali Augusto nia hirus matan rezulta Augusto monu ba rai hafoin arguidu sama Augusto nia liman kabun parte karuk ba rai. Entretantu arguidu Eugenio kaer katana hakilar dehan taa tiha sira niaibun laran.

Prokuradór akuza arguidu sira kontra artigu 2(nú.1(b), nú. 2(f)) no artigu 20(nú.1) hosi Lei Nú. 5/2017 kona-ba Arte Marsiais, Rituais, Armas Brankas, Rama Ambon no Kinta Alterasaun Kódigu Penál.

Produsaun ba prova sira

Iha prosesu julgamentu, arguidu na'in rua deklara katak, faktu sira iha akuzasaun ne'e loos hotu no uza duni katana tanba Augusto ho ninia família sira uza traktor estraga tiha sira nia feuk ne'ebé kuda iha natar laran. Maibé arguidu deklara katak sira di'ak malu ona Augusto ho nia família, arrepende sira ninia hahalok foin primeiravés mai hatan iha tribunál, no serbisu nu'udar agrikultór hodi sustenta de'it ba família.

Alegasaun finál

Prokuradór haktuir katak iha produsaun ba prova arguidu sira konfesa faktu katak uza no utiliza katana ba atividade krime ne'ebé lei proíbe ka bandu. Atu prevene arguidu sira nia hahalok ne'e iha futuru, nune'e husu ba tribunál atu kondena arguidu ho pena prizaun tinan tolu suspende ba tinan tolu.

Entretantu, defeza husu ba tribunál atu kondena arguidu sira ho pena ne'ebé kmaan ho konsiderasaun katak arguidu sira konfesa, arrepende sira ninia hahalok, foin primeiravés mai hatan iha tribunál.

Desizaun

Depoizde avalia faktu hotu, tribunál prova katak faktu iha akuzasaun ne'e provadu hotu bazeia ba arguidu nain rua nia deklarasaun ne'ebé konfirma ho akuzasaun prokuradór nian.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu na'in rua konfesa faktu sira, arrepende sira ninia hahalok no foin primeiravés mai hatan iha tribunál. Tanba ne'e tribunál konklui prosesu

ne'e no kondena arguidu sira ho pena prizaun tinan tolu suspende ba tinan tolu.

2. Krime ofensa ba integridade física simples ho natureza violéncia doméstika

Nú. Prosesu : 0009/24. BCPVN
Kompozisaun Tribunál : Singulár
Juis : Dra. Sribuana da Costa
Prokuradór : Dr. Bartolomeu de Araújo
Defeza : Dr. Germano Guterres Ramos
Desizaun : Pena multa US\$60.00

Iha 11 Dezembru 2024, Tribunál Judisiál Primeira Instáncia Baukau, prezide leitura sentensa ba krime ofensa ba integridade física simples ho natureza VD ne'ebé envolve arguidu AL hasoru nia feen, Munisípiu Baukau.

Akuzasaun Prokuradór

Prokuradór akuza katak iha 15 Maiu 2024, iha oras tuku 19:00 kalan, arguidu basa dala rua iha ofendida nia hasan. Antes ne'e, arguidu ho ofendida diskute malu kona-ba ofendida kontaktu arguidu atu foti manu tolun iha dalan maibé arguidu la simu telefone.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu deklara katak faktu iha akuzasaun ne'e loos hotu, arguidu la simu telefone tanba kondus hela motor. Maibé arguidu haktuir katak depoisde akontese sira di'ak malu ona tanba forma família dezde tinan 1998. Sira iha oan na'in neen, foin primeiravés baku ofendida, arrepende ninia hahalok no arguidu nu'udar motorista kompañia ho vensimentu kada fulanUS\$300.00 hodi sustenta de'it ba família.

Alende ne'e, ofendida mós konfirma faktu hotu iha akuzasaun no deklara katak arguidu foin halo agresaun hasoru ofendida, depoisde akontese sira di'ak malu ona no to'o agora arguidu la baku ona ofendida.

Alegasaun finál

Prokuradór haktuir katak faktu ne'ebé akuza ba arguidu ne'e provadu haree ba arguidu nia konfiksaun no ofendida nia konfirmasaun ba akuzasaun. Mezmu di'ak malu ona maibé presiza prevene arguidu nia konduta iha futuro, nune'e husu ba tribunál atu kondena arguidu ho pena prizaun fulan rua suspende ba tinan ida.

Alende ne'e, defeza haktuir katak arguidu konfesa faktu ho integralmente, arrepende ninia hahalok, di'ak malu ona ho ofendida no foin primeiravés mai hatan iha tribunal. Tanbba ne'e parte defeza konkorda ho prokuradór nia alegasaun.

Desizaun

Depoisde avalia faktu hotu, tribunál prova katak faktu iha akuzasaun ne'e provadu hotu bazeia ba arguidu nia deklarasaun no konfirma mós hosi ofendida.

Bazeia ba faktu provadu sira ne'e no tetu mós ho sirkunstánsia atenuante sira ne'ebé produs durante julgamentu hanesan arguidu konfesa faktu sira, arrepende ninia hahalok no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena multa US\$60.00 ne'ebé arguidu sei selu US\$1.00 kada loron durante loron 60. Tribunál mós fiksa pena alternativa durante loron 40 prizaun, bainhira arguidu la kumpri pena multa refere.

3. Krime ofensa ba integridade fízika simples ho natureza violénsia doméstika

Nú. Prosesu : 0098/23. PDBAU
Kompozisaun Tribunál : Singulár
Juis : Dra. Sribuana da Costa
Prokuradór : Dr. Bartolomeu de Araújo
Defeza : Dr. Germano Guterres Ramos
Desizaun : Absolve

Iha 11 Dezembru 2024, Tribunál Judisiál Primeira Instánsia Baukau, prezide leitura sentensa ba krime ofensa ba integridade fízika simples ho natureza VD ne'ebé envolve arguidu MB hasoru nia feen, iha Munisípiu Lautein.

Akuzaun Prokuradór

Prokuradór akuza katak iha Setembru 2023, iha oras tuku 23:00 kalan, arguidu tuku dala haat iha ofendida nia reen-toos, tebe dala rua iha ofendida nia kabun parte karuk, no duni ofendida fila ona ba ofendida nia inan no aman nia uma. Hafoin ofendida halai tama ba kios laran arguidu ba tuir uza liman sikun fai dala ida iha ofendida nia kotuk laran no durante moris hamutuk arguidu sempre halo agresau hasoru ofendida. Antes ne'e, arguidu ho ofendida diskute malu kona-ba arguidu iha relasaun amante (*selingkuh*) ho fetu seluk.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(a) no 35 (b) LKVD.

Produsaun ba prova sira

Iha prosesu julgamento, arguidu deklarata katak la halo agresau ruma hasoru ofendida, maibé arguidu ho ofendida diskute malu de'it kona-ba ofendida nia maun kontaktu arguidu atu ko'alia kona-ba ofendida ho arguidu nia barlake. Maibé arguidu hatan ba ofendida nia maun katak arguidu nia inan foin mak mate, liu tiha mak ko'alia barlake. Derepente Ministériu Públiku telefone arguidu atu presta deklarasaun kona-ba arguidu mak halo agresau hasoru ofendida.

Alende ne'e, ofendida mós deklara katak, arguidu la halo agresaun ruma hasoru ofendida, faktu ne'ebé ofendida deklara iha Minsitériu Públiku ne'e laloos hotu maibé ofendida mak hakarak keixa arguidu tanba ofendida nia maun ho arguidu iha dezintedimentu.

Alegasaun finál

Prokuradór haktuir katak arguidu nega totalmente ba faktu iha akuzasaun no ofendida hato'o keixa direita iha Ministériu Públiku la'os liuhosi Polísia. Prokurador konsidera ofendida bosok iha tribunál katak arguidu la halo agresaun hasoru ofendida. Ho razaun hirak ne'e husu ba tribunal atu absolve arguidu hosi prosesu ne'e. Maibé Ministériu públiku sei loke prosesu hasoru ofendida ba krime falsfika deklarasaun.

Entretantu, defeza haktuir katak iha produsaun ba prova arguidu deklara katak la komete faktu iha akuzasaun ne'e hasoru ofendida no ofendida mós konfirma ho arguidu ninia deklarasaun. Nune'e husu ba tribunál atu absolve arguidu hosi krime ne'e.

Desizaun

Depoizde avalia faktu hotu ne'ebé produs durante julgamentu tribunál konsidera faktu iha akuzasaun ne'e la provadu, nune'e tribunál konklui prosesu ne'e no absolve arguidu hosi krime ne'e.

4. Krime ofensa ba integridade fízika simples ho natureza violénsia doméstika

Nú. Prosesu	: 0013/24. BCQLC
Kompozisaun Tribunál	: Singulár
Juis	: Dra. Sribuana da Costa
Prokuradór	: Dr. Bartolomeu de Araújo
Defeza	: Dr. Grigorio M. L. de Lima
Desizaun	: Pena prizaun tinan 1 suspende ba tinan 1

Iha 11 Dezembru 2024, Tribunál Judisiál Primeira Instánsia Baukau, prezide leitura sentensa ba krime ofensa ba integridade fízika simples ho natureza VD ne'ebé envolve arguidu SB (oan) hasoru nia aman, iha Munisípiu Baukau.

Akuzasaun Prokuradór

Prokuradór akuza katak iha 30 Maiu 2024, iha oras tuku 23:00 kalan, arguidu tebe dala rua iha ofendidu nia kotuk laran, buti ofendidu nia kakorok no tuku iha ofendidu nia oin. Antes ne'e, arguidu ho ofendidu diskute malu kona-ba arguidu nia feen tau lia ba arguidu katak ofendidu baku fali nia bei-oan sira.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa, konjuga ho artigu 2, 3, 35(b) no 36 LKVD.

Produsaun ba prova sira

Iha prosesu julgamentu, arguidu konfesa katak faktu iha akuzasaun ne'e loos hotu, di'ak malu ona, arrepende ninia hahalok tanba baku fali ofendidu

nu'udar nia aman rasik. Ofendidu katuas ona hela ho arguidu depoisde akontese arguidu la baku ona ofendidu to'o agora.

Alende ne'e, ofendidu konfirma faktu sira iha akuzasaun, ofendidu nu'udar arguidu nia aman no depoisde akontese arguidu husu ona deskulpa ba ofendidu no ofendidu mós perdua ona arguidu nu'udar nia oan.

Alegasaun final

Prokuradór haktuir katak faktu iha akuzasaun prokuradór provadu bazeia ba arguidu nia deklarasaun no ofendidu nia konfirmasaun ba akuzasaun. Prokuradór entende katak arguidu komete krime hasoru nia aman rasik no atu prevene arguidu nia hahalok ne'e iha futuro, husu ba tribunál atu kondena arguidu ho pena prizaun tinan ida suspende ba tinan ida.

Entretantu, defeza haktuir katak bazeia ba produsaun ba prova parte defeza konkorda ho prokuradór ninia alegasaun.

Desizaun

Depoisde avalia faktu hotu, tribunál prova katak faktu iha akuzasaun ne'e provadu hotu bazeia ba arguidu nia deklarasaun ne'ebe konfirma ho akuzasaun.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa faktu sira, arrepende ninia hahalok no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena prizaun tinan ida suspende ba tinan ida.

5. Krime ofensa ba integridade física simples ho natureza violência doméstica

Nú. Prosesu	: 0081/23. VQVQQ
Kompozisaun Tribunál	: Singulár
Juisa	: Dra. Albertina da Conceição das Neves
Prokuradór	: Dr. Bartolomeu de Araújo
Defeza	: Dr. Grigório M. L. de Lima
Desizaun	: Pena prizaun fulan 5 suspende ba tinan 2

iha 12 Dezembru 2024, Tribunál Judisiál Primeira Instánsia Baukau, prezide leitura sentensa ba krime ofensa ba integridade física simples ho natureza VD ne'ebé envolve arguidu AGN (*membru PNTL*) hasoru nia feen, iha Munisípiu Vikeke.

Akuzasaun Prokuradór

Prokuradór akuza katak, iha 21 Novembru 2023, iha oras tuku 17:00 lokraik arguidu foti fatuk tuku dala ida iha ofendida nia kanuruk no tuku dala ida iha kotuk laran tanba arguidu deskonfia ofendida ba mane seluk.

Prokuradór akuza arguidu kontra artigu 145 KP kona-ba ofensa ba integridade física simples ho nia moldura penál to'o tinan 3 ka multa no konjuga ho artigu 2, 3, 35(b) no 36 LKVD.

Produsaun ba prova sira

Iha prosesu julgamentu, arguidu konfesa parsial katak iha akontesimentu ne'e arguidu uza fatuk tuku dala ida iha ofendida nia kotuk laran no arguidu la tuku ofendida ninia kanuruk. Depoizde akontesimentu ne'e sira di'ak malu ona, to'o agora moris hamutuk nafatin nu'udar feen la'en, arguidu nu'udar membru PNTL ho salariu kada fulan US\$540.00.

Alende ne'e, ofendida konfirma faktu sira iha akuzasaun no deklarata katak depoizde akontesimentu ne'e sira di'ak malu ona to'o agora arguidu la baku ona ofendida.

Alegasaun finál

Prokuradór haktuir katak mezmu arguidu konfesa parsial maibé ofendida konfirma totalmente, arguidu nu'udar membru PNTL hatene di'ak kona-ba hahalok krime sira maibé arguidu mak komete fali hahalok ne'e hasoru ofendida nu'ufar nia feen. Tanba ne'e husu ba tribunál atu kondena arguidu ho pena prizaun fulan rua suspende ba tinan ida.

Entretantu, defeza haktuir katak arguidu deklarata de'it faktu ne'ebé arguidu komete no sira si'ak malu ana, nune'e husu ba tribunál atu kondena arguidu ho pena ne'ebé adekuadu.

Desizaun

Depoizde avalia faktu hotu, tribunál prova katak arguidu foti fatuk tuku dala ida iha ofendida nia kanuruk no tuku dala ida iha kotuk laran.

Bazeia ba faktu provadu sira ne'e no tetu mós ho sirkunstánsia hotu-hotu ne'ebé haleu krime ne'e, nune'e tribunál konklui prosesu ne'e no kondena arguidu ho pena prizaun fulan lima suspende ba tinan rua.

6. Krime ofensa ba integridade fízika simples ho natureza violénsia doméstika

Nú.Prosesu : 0006/24. VQWTL
Kompozisaun Tribunál : Singulár
Juis : Dra. Maria Modesta de Almeida vieira
Prokuradór : Dr. Julio da Silva Correia
Defeza : Dr. Germano Guterres Ramos
Desizaun : Pena prizaun fulan 3 suspende ba tinan 1

Iha 16 Dezembru 2024, Tribunál Judisiál Primeira Instánsia Baukau, prezide leitura sentensa ba krime ofensa ba integridade fízika simples ho natureza VD ne'ebé envolve arguidu JdS hasoru nia inan, iha Munisípiu Vikeke.

Akuzaun Prokuradór

Prokuradór akuza katak iha Janeiru 2024, iha oras tuku 18:00 lokraik, arguidu basa dala rua iha ofendida nia hasan parte loos no karuk, arguidu kaer ofendida nia hasan hodi dulas. Antes ne'e, arguidu ho ofendida diskute malu tanba arguidu fila ba uma ho kondisaun lanu.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa no konjuga ho artigu 2, 3(a) no 35 (b) no 36 LKVD.

Produsaun ba prova sira

Iha prosesu julgamentu, arguidu deklara katak faktu iha akuzasaun ne'e loos hotu, arguidu mós deklara katak iha akontesimentu ne'e arguidu ho kondisaun lanu. Arguidu arrepende ninia hahalok tanba halo fali hasoru nia inan rasik, di'ak malu ona, foin primeiravés mai hatan iha tribunál no nu'udar agrikultór rezultadu hodi sustenta de'it ba família. Alende ne'e, prokuradór husu ba tribunál atu prezinde deklarasaun hosi ofendida no hosi parte defeza laiha opozisaun, nune'e tribunál bazeia ba pedidu ne'e no presinde deklarasaun hosi ofendida.

Alegasaun finál

Prokuradór haktuir katak, arguidu nia aktu ne'e provadu tuir faktu iha akuzasaun. Tanba ne'e, mezmú sira di'ak malu ona, maibé atu prevene arguidu repete tan ninia hahalok ne'e iha futuro. Tanba ne'e husu ba tribunál atu kondena arguidu ho pena prizaun fulan rua suspende ba tinan ida.

Entretantu, defeza haktuir katak iha julgamentu ne'e arguidu konfesa totál ba faktu sira iha akuzasaun, arrepende ninia hahalok, foin primeiravés mai hatan iha tribunál no nu'udar agrikultór rezultadu hodi sustenta de'it ba família.

Desizaun

Depoizide avalia faktu hotu, tribunál prova katak arguidu basa dala rua iha ofendida nia hasan parte loos no karuk, arguidu kaer ofendida nia hasan hodi dulas.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa, arrepende ninia hahalok no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena prizaun fulan tolu suspende ba tinan ida.

7. Krime ameasa

Nú. Prosesu	: 0024/24. VQWTL
Kompozisaun Tribunál	: Singulár
Juisa	: Dra. Sribuana da Costa
Prokuradór	: Dr. Julio da Silva Correia
Defeza	: Dr. Germano Guterres Ramos
Desizaun	: Pena multa US\$60.00

Iha 19 Dezembru 2024, Tribunál Judisiál Primeira Instánsia Baukau, prezide leitura sentensa ba krime ameasa ne'ebé envolve arguidu ARdC hasoru nia feen, iha Munisípiu Vikeke.

Akuzasaun Prokuradór

Prokuradór akuza katak iha 12 Feveiru 2024, iha oras tuku 09:00 dadeer, arguidu telefone ba ofendida katak "*kuandu ha'u nia feen sigundu telefone ó tenki simu, la simu mak hau sei baku mate ó, karik ó maun sira mak tama*

mós oho malu tiha,”. Arguidu nia aktu ne’e halo ofendida ta’uk, nune’e ofendida sai hosi sira nia uma ba hela tiha iha nia inan ho aman nia uma.

Prokuradór akuza arguidu kotra artigu 157 KP kona-ba ameasa ho moldura penál to’o tinan 1 ka multa.

Produsaun ba prova sira

Iha prosesu julgamentu, arguidu deklara katak faktu iha akuzasaun ne’e loos hotu, momentu ne’e arguidu seidauk hola feto maibé sei namora de’it, akontese to’o agora seidauk di’ak malu, arrepende ninia hahalok no arguidu nu’udar xefe aldeia ho vensimentu kada fulan US\$150.00.

Alende ne’e, ofendida deklara katak arguidu ameasa ofendida liuhosi telefone, ne’e mak ofendida ta’uk ba hela tiha iha nia inan aman nia uma to’o agora. Dala ruma sira hasoru malu maibé la hasee malu. Seidauk di’ak malu tanba arguidu ho feen sigundu hela tiha ona iha sira nia uma.

Alegasaun finál

Prokuradór haktuir katak arguidu konfesa faktu hotu iha akuzasaun no ofendida mós konfirma ho akuzasaun katak arguidu nia aktu ne’e halo ofendida ta’uk ba hela tiha iha ho nia inan aman to’o agora la fila ba arguidu. Tanba ne’e husu ba tribunál atu kondena arguidu ho pena prizaun fulan rua supende ba tinan ida.

Entretantu, defeza haktuir katak arguidu konfesa faktu no haree ba ofendida nia deklarasaun katak de poisde akontese sira lao hasoru malu hanesan bai-bain de’it no la sente ta’uk, tanba ne’e husu ba tribunal atu absolve arguidu hosi prosesu ne’e.

Desizaun

Depoisde avalia faktu hotu, tribunál prova katak faktu iha akuzasaun prokuradór nian provadu hotu, bazeia ba arguidu nia deklarasaun ne’ebé konfirma akuzasaun.

Bazeia ba faktu provadu sira ne’e no tetu mós ho sirkunstánsia atenuante sira hanesan arguidu konfesa faktu sira, arrepende ninia hahalok, nune’e tribunál konklui prosesu ne’e no kondena arguidu ho pena multa US\$60.00 ne’ebé arguidu sei selu US\$1.00 kada lora durante lora 60. Tribunál mós fiksa pena alternativa durante lora 40 prizaun, bainhira arguidu la kumpri pena multa refere.

8. Krime ofensa ba integridade fízika simples ho natureza violénsia doméstika

Nú.Prosesu	: 0012/24. VQWTL
Kompozisaun Tribunál	: Singulár
Juisa	: Dra. Sribuana da Costa
Prokuradór	: Dr. Julio da Silva Correia
Defeza	: Dr. Germano Guterres Ramos
Desizaun	: Pena multa US\$30.00

Iha 19 Dezembru 2024, Tribunál Judisiál Primeira Instánsia Baukau, prezide leitura sentensa ba krime ofensa ba integridade fízika simples ho VD doméstika ne'ebé envolve arguidu AJP hasoru nia feen, iha Munisípiu Vikeke.

Akuzasaun Prokuradór

Prokuradór akuza katak iha 13 Fevereiru 2024, iha oras tuku 14:00 lokraik, arguidu lori bee fakar iha ofendida nia isin, basa dala rua iha ofendida nia hasan parte loos no karuk tanba arguidu haruka ofendida kahur masa maibé ofendia lakohi.

Prokuradór akuza arguidu kotra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu deklara katak faktu iha akuzasaun ne'e loos hotu, depoisde akontese sira di'ak malu ona tanba forma família dezde tinan 2015. Sira iha oan na'in rua foin primeiravés mai hatan iha tribunál, arrepende ninia hahalok no arguidu nu'udar agrikultór ho rendimentu ne'ebé la fiksu.

Alende ne'e, prokuradór husu ba tribunál atu prezinde deklarasaun hosi ofendida no hosi parte defeza laiha opozisaun, nune'e tribunál bazeia ba pedidu ne'e no presinde deklarasaun hosi ofendida.

Alegasaun finál

Prokuradór haktuir katak arguidu nia aktu ne'e priense krime ofensa ba integridade fízika simples ho natureza violénsia doméstika. Mezmu sira di'ak malu ona maibé husu ba tribunál atu kondena arguidu ho pena multa US\$30.00.

Entretantu, defeza haktuir katak arguidu konfesa integralmente ba faktu iha akuzasaun, arrepende ninia hahalok, di'ak malu ona ho ofendida no foin primeiravés mai hatan iha tribunal. Tanba ne'e husu ba tribunál atu kondena arguidu ho pena ne'ebé kmaan.

Desizaun

Depoisde avalia faktu hotu, tribunál prova katak faktu iha akuzasaun prokuradór nian provadu hotu, bazeia ba konfisaun arguidu nian.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa, arrepende ninia hahalok no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena multa US\$30.00 ne'ebé arguidu sei selu 0.50 sentavus kada lora durante lora 60. Tribunál mós fiksa pena alternativa durante lora 40 prizaun, bainhira arguidu la kumpri pena multa refere.

9. Krime ofensa ba integridade fízika simples ho natureza violénsia doméstika

Nú. Prosesu : 0040/24. VQWTL

Kompozisaun Tribunál : Singulár
Juisa : Dra. Sribuana da Costa
Prokuradór : Dr. Julio da Silva Correia
Defeza : Dr. Germano Guterres Ramos
Desizaun : Pena multa US\$30.00

Iha 19 Dezembru 2024, Tribunál Judisiál Primeira Instánsia Baukau, prezide leitura sentensa ba krime ofensa ba integridade fízika simples ho natureza VD ne'ebé envolve arguidu MLC hasoru nia feen, iha Munisípiu Vikeke.

Akuzasaun Prokuradór

Prokuradór akuza katak iha 30 Maiu 2024, iha oras tuku 07:00 dadeer, arguidu uza ai-sanak baku dala ida iha ofendida nia ulun, tuku dala rua iha tilun hun rezulta ofendida monu no dezmaia. Antes ne'e, arguidu ho ofendida diskute malu kona-ba ofendida hase'e arguidu nusa la hakmatek iha uma la'o hela deit.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(a) no 35 (b) no 36 LKVD.

Produsaun ba prova sira

Iha prosesu julgamentu, arguidu deklara katak faktu sira akuzasaun ne'e loos hotu, forma família dezde tinan 2018, iha oan na'in rua. Arguidu deklara foin primeiravés mai hatan iha tribunál no promete sei la komete tan krime hanesan iha futuro. Depoisde akontesimentu di'ak malu ona ho ofendida, arguidu nu'udar agrikultór rezultadu hodi sustenta de'it ba família.

Alegasaun finál

Prokuradór haktuir katak indisiu forte arguidu halo agresaun hasoru ofendida, arguidu uza ai baku no tuku iha ofendida nia tilun hun to'o ofendida lakon konsiénsia. Tanab ne'e, mezmu sira di'ak malu ona, maibé atu prevene arguidu repete nia hahalok ne'e iha futuro, husu ba tribunál atu kondena arguidu ho pena prizaun tinan ida suspende ba tinan ida.

Entretantu, defeza husu ba tribunál atu kondena arguidu ho pena ne'ebé kmaan ho konsiderasaun katak, arguidu konfesa, arrepende nia hahalok, di'ak malu ona ho ofendida.

Desizaun

Depoisde avalia faktu hotu, tribunál konsidera faktu hotu iha akuzasaun prokurador nian provadu hotu.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa, arrepende ninia hahalok no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena multa US\$30.00 ne'ebé arguidu sei selu 0.50 sentavus kada liron durante liron 60. Tribunál mós fiksa pena alternativa durante liron 40 prizaun, bainhira arguidu la kumpri pena multa refere.

10. Krime ofensa ba integridade fízika simples ho natureza violénsia doméstika

Nú. Prosesu : 0024/24.VQVQQ
Kompozisaun Tribunál : Singulár
Juisa : Dra. Sribuana da Costa
Prokuradór : Dr. Julio da Silva Correia
Defeza : Dr. Germano Guterres Ramos
Desizaun : Pena multa US\$30.00

Iha 19 Dezembru 2024, Tribunál Judisiál Primeira Instánsia Baukau, prezide leitura sentensa ba krime ofensa ba integridade fízika simples ho natureza VD ne'ebé envolve arguidu JS hasoru nia feen, iha Munisípiu Vikeke.

Akuzasaun Prokuradór

Prokuradór akuza katak iha 28 Marsu 2024, iha oras tuku 23:00 kalan, arguidu basa dala rua iha ofendida nia ulun parte karuk, buti kakorok, rasta fuuk no dada ofendida ba iha kuartu laran soe ofendida ba iha kama leten no tuku dala ida iha tilun hun parte karuk. Antes ne'e, arguidu ho ofendida diskute malu kona-ba arguidu ba serbsiu halo ema nia uma simu osan US\$30.00, arguidu uza hodi sosa tiha tua hodi hemu.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3 (a), 35(b) no 36 LKVD.

Produsaun ba prova sira

Iha prosesu julgamentu, arguidu deklara katak faktu iha akuzasaun ne'e loos hotu, depoisde akontese, sira di'ak malu kedas. Arguidu arrepende ninia hahalok. Antes ne'e, iha tinan 2014, arguidu mai ona tribunál ho kazu hanesan no tribunál konadena ona arguidu ho pena prizaun suspende ninia ezekeusaun no arguidu nu'udar agrikultór rezultadu hodi sustenta de'it ba família.

Alende ne'e, prokuradór husu ba tribunál atu prezinde deklarasaun hosi ofendida no hosi parte defeza laiha opozisaun, nune'e tribunál bazeia ba pedidu ne'e no presinde deklarasaun hosi ofendida.

Alegasaun finál

Prokuradór haktuir katak faktu akuzasaun prokuradór provadu haree ba arguidu nia konfiksaun kona-ba faktu sira iha akuzasaun totalmente. Arguidu iha antesidente kriminal/la hatudu ninia arrependementu mezmu sira di'ak malu maibé nafatin husu ba tribunál fo kondenasaun ba arguidu mak fó pena prizaun tinan rua suspende ba tinan rua.

Entretantu, defeza haktuir katak haree ba produsaun ba prova parte defeza husu ba tribunál fó pena ne'ebé kmaan ba arguidu.

Desizaun

Depoisde avalia faktu hotu, tribunál prova katak arguidu basa dala rua iha ofendida nia ulun parte karuk, buti kakorok, rasta fuuk no dada ofendida ba iha kuartu laran soe ofendida ba iha kama leten no tuku dala ida iha tilun hun parte karuk.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa faktu sira, arrepende ninia hahalok no foin primeiravés mai hatan iha tribunal. Tanba ne'e tribunál konklui prosesu ne'e no kondena arguidu ho pena multa US\$30.00 ne'ebé arguidu sei selu 0.50 sentavus kada laron durante laron 60. Tribunál mós fiksa pena alternativa durante laron 40 prizaun, bainhira arguidu la kumpri pena multa refere.

Atu hetan informasaun liutan favór kontaktu:

Ana Paula Marçal
Diretora Ezekutiva JSMP
Telefone: 3323883/77040735
Diresaun e-mail: ana@jsmp.tl
info@jsmp.tl
Website: <http://jsmp.tl>